




# O LE SULU SAMOA



EKALESIA FAAPOTOPOTOGA KERISIANO SAMOA  
O LE NUSIPEPA FAA-LE-LOTU NA FAAVAEINA I LE T.A. 1839



FAAVAEINA 1839

O LE SULU SAMOA

ME 2016

email: sulusamoa@cccs.org.ws -Main Office: Ph. 24414, Ext 30 - website: www.cccs.org.ws

Manatu Autu o le Fono Tele 2016:

## “Vaaiga i le Agaga o le Atua”


*saunia e*

**Tupulaga Talavou**  
Matagaluega a Malua

Manatu e fia faamamafa:  
**Matagi o Suiga Lelei**  
(Wind of Good Changes)

O le upu matagi o loo faamatalaina ai le tasi natura o le Agaga Paia o le Atua, e pei ona molimau iai le tusi o Kenese, aemaise lava i le tala o le foafoaga.

*faaauau itulau e 2*



Susuga Tauti'aga Senara FT,  
Taitaifono 2016-2017



Susuga Tunumoso Soliola Iosia  
FT, Sui Taitaifono 2016-2017

## Amata le Fono Tele i le Sailia o se Failautusi Aoao

O le aso muamua o le Fono Tele a le Ekalesia i lenei tausaga na amata ai galuega a le Fono Tele i le palotaina lea o se Failautusi Aoao e sui i le Susuga Rev. Afereti Uili FS, ua faamalolo mai le galuega sa ia tau'aveina.

E toatele na faatutu mai i le palota muamua sa faatautaia e le silasila itulau e 2



Susuga Vavatau Taufao FS,  
Failautusi Aoao o le EFKS

Susuga Rimoni Wright FS,  
Teutepe a le Ekalesia

---

## Manatu Autu o le Fono Tele 2016:

# “Vaaiga i le Agaga o le Atua”

*mai le itulau muamua*

*saunia e*

## Tupulaga Talavou

### Matagaluega a Malua

E pei ona ta'ua i le mataupu 1, fuaiupu e lua: “*Sa soona nunumi le lalolagi ma ua gaogao, sa ufitia foi le moana i le pouliuli, na fegaoioia'i foi le Agaga o le Atua i le fogatai.*” I se isi ona faaupuga lata mai, o le upu Agaga e pei ona ta'ua i le Kenese muamua a o lona fuaiupu e lua, o loo faatusaina i le ‘matagi.’ O lona uiga o le molimau a le tusi o Kenese, sa leai se ola, sa leai se fesoota'iga o mea uma, sa aunoa foi se faatulagaga lelei ma le manino o mea uma i le lalolagi. Ae ina ua fegaoioia'i le Agaga poo le Matagi a le Atua, o ina na afua ai le ola. Ua le gata ua iai le ola i mea uma, a ua tuu faavasega ma maioio ai le ta'otoga o mea uma lava.

O le matagi la poo le Agaga o loo molimau ai Kenese, o le “OLA” lava lea. A o le ola foi o loo faama'itea suiga fou ma le atoatoa ua finagalo ai le Atua, ina ia lelei ma matagofie mea uma. O le “OLA” ina ia mautu ma mausali mea uma e oo lava foi i le tagata, ia ola i se olaga ua faafouina, ia ola magafagafa, ola mataala, ola mafuta ae sili ma le taua, ia ola auauna ma mata'u i le Atua, aua e pogai ai ona tumau ma faalagolago tupulaga talavou i le Atua, aua o lona Agaga, o le matagi e afua ai mea lelei ma le mautinoa i le soifua ma le ola.

Afai la o le matagi poo le Agaga o le Atua na afuaina mea uma lava o le foafoaga, o lona uiga la, e finagalo le Atua ia o gatasi ma aga'i i se itulagi e tasi le matagi ma le olaga o le tagata talavou.

Aua i le vaaiga faa-saienisi, e le mafai e le malosi o le tagata ona tetee pe taumafai e faafetaui le matagi. Ae ao lava i le tagata, (tama ma le teine talavou), ona loto atu i aluga ma le itulagi o loo aga'i iai le malosi ma le agi a le matagi. E tutusa lelei la le vaaiga lea faa-saienisi i le natura o le matagi, ma le finagalo pa'ia o le Atua, o le Agaga lava lea o le Atua mo lana tagata na fai. Ia manino ma loto atu le mafaufau ma gaoioiga a le tagata, ma le alafua poo le auga o le finagalo o le Atua. Aua foi o loo manino lava i le molimau a le Kenese, i se vaega o le mataupu 1, fuaiupu e 2: “...na fegaoioia'i foi le Agaga o le Atua i le fogatai.” O se faaupuga o loo manino mai ai, o lona Agaga ma lona malosi sa pogai ai le ola ma le tulaga mausali i le fogatai ma le laueleele ma mea uma o iai. O loo atagia ai foi i lenei faaupuga le ola ma le avanoa ua maua mai le Atua mo le tupulaga talavou e fai ai mea sili, e atia'e ai mea lelei, e tausisi ai i le faamaoni,

ma tumau ai i le Atua e le aunoa.

O loo tautala ai foi Luka, ma ia faatusa ai le auina ifo e le Atua o lona Agaga Pa'ia, (Galuega 2:2) “*Ona faafuase'i mai lea o le taalili mai le lagi; peiseai o le matagi ua agi tele mai, ua tumu uma ai le fale sa latou nonofo ai*”, a o faatalitali Iutaia uma i Ierusalem ma le loto gatasi i le Aso Penetekoso.

O le Matagi poo le Agaga o suiga, na te faatumuina i latou uma na iai, na mafua ai ona tautala atu Peteru ma faailoa atu ia te i latou uma na iai, e le o onana i latou. A o le mea lea na fai mai ai le perofeta o Ioelu, “O ona aso e gata ai, o loo faapea mai le Atua, e iu ina ou liligi ifo ai lo'u Agaga i luga o tagata uma lava, ona perofeta mai lea o outou atalii ma o outou afafine, e iloa faaaliga e o outou taulele'a, e fai miti foi o outou toeaina.”

O lona uiga, o le auina mai e le Atua o lona Agaga e gagana ai, e aofia ai tagata uma, e tofua sao i le *faaauau itulau e 4*

---

## Amata le Fono Tele i le Sailia o se Failautusi Aoao ma se Sui Taitaifono

*mai le itulau muamua*

Pule o le Kolisi Faafaifeau i Malua ma faiaoga. Peitai na faai'u le palota i le manumalo o le Susuga Rev. Vavatau Taufao FS i le 383 palota, mai ia Rev. Talia Tapaleao FS e 348 ana palota. Ua tuua nei e le Susuga Vavatau lona tofiga sa iai, o le Faatonu Sili o A'oga a le Ekalesia, ae see atu e galue o le Failautusi Aoao o le Ekalesia.

E toatele lava nisi sa manatu, e ui ina fetui lelei foi le Susuga Vavatau mo le tofiga o le Failautusi

Aoao, peitai, o lona tula'i mai o le Faatonu Sili o A'oga a le Ekalesia, na matua tele ni suiga lelei na aliali mai ai i a'oga, ma faia'oga, a le Ekalesia. O le a misia e le Komiti o A'oga le Susuga Vavatau, ona o lona loto tele, ma'ema'e, tapenapena lelei, mae'ae'a ana sauniuniga e avatu i fonu a le Komiti. Ui lava i lea, e pule lava le Fono Tele i ana tagata faigaluega. Talosia ina ia tula'i mai se tasi e na te faaauauina ma *faaauau itulau e 9*

---

# Faigalotu e Tatalaina ai le Fono Tele 2016

## O LE LAUGA

Taitaiina e le Susuga Tavita Roma FT,  
Taitaifono o le Ekalesia 2015-2016

Tusi Faitau: Ioelu 2: 28-32  
Matua: Mulimuli ane, e i'u ina ou liligi ifo ai lo'u Agaga i luga i tagata uma; ona perofeta ai lea o outou atalii ma o outou afafine, e fai miti o outou toeaina, e iloa faaaliga e o outou taulele'a.

Manatu Autu o le Fono Tele e faapea: "Vaaiga i le Agaga o le Atua."

Ia o ai ua vaai i se agaga? A o ai ua vaai i le Agaga o le Atua? Ae mafai ona toe faaupu le manatu autu faapea: "Vaaiga i le finagalo o le Atua. Aua e mafai ona e silafia ma o tatou iloa le finagalo o le Atua, o iina foi o iai lona Agaga.

A o ulua'i upu o le tusi a le perofeta o Ioelu, o loo amata lava i lana valaau i toeaina o le nuu fai mai:

**"Outou toeaina e,** ina faalogologo mai ia **i lenei mea,** o outou uma o e nonofo i le nuu, ia outou liliu mai o outou taliga, **pe na iai le mea nei i** ona po o outou, poo ona po o outou tama?" (1:2).

Pe se mea na iai muamua i le nuu. Pe se mea na tupu muamua i o latou taimi. Poo taimi o o latou tama.

**O le a le mea lea e atugalua iai le perofeta?**

Ioe, o le lau'ele'ele ua faalaulau toafa, ina ua 'aina e Se Kasama. O laau ua totoe mai ua le 'aina e Se Kasama, ua faatama'ia e Se

Akerise. O laau ua totoe mai Se Akerise, ua 'aina e Se Aleka.

A totoe mai Se Aleka, ua 'aina e Se Kasili. 'Aina mai moemoe se'ia oo i le tafu'e', aina lava se'ia mamae, mago ma mate loa.

O faato'aga ma laau toto, o le vine ma le mati sa faamoemoe iai le fofoga taumafa ma le uaina, ua faatama'ia uma. O le vaaiga foi lena a Ioelu, i le tulaga ua iai le nuu o le Atua. O le nuu ua mamae, ua mago ma ua mate i la le faatuatua.

O le manatu o Ioelu, o le faalaulau toafa ai o tuamaota o le nuu, ina ua pala fatu saito ma faatafunaina fale saito. Ua fetagisi manu vaefa. Ua puapuagatia lafu povi ma lafu mamoe ina ua leai se mea'ai. Ua 'aina foi e le afi mea e tataa ai manu. Ua mamate foi vaitafe ma alia. O le faailo lea, ua latalata mai le Aso o le Alii.

Lea la e fesili ai le perofeta i le 'au sinasina o le nuu fai mai: "Outou toeaina, na tupu muamua se mea faapea i outou taimi? Poo taimi o outou tuua ua lagomau i tiasa? Na tupu muamua se faaaliga faapenei? Aua o lea ua taugā le ta; ua 'i'ite foi fanua lalo, 'ai ua latalata mai le Aso o le Alii. 'Ai ua oo mai le faatafunaina ma le oti.

O tupu, o faamasino, o le 'au ositaulaga, ma toeaina o le nuu, o le saofa'iga lena sa lipoi ai upu o le nuu o le Atua. O i latou ia na liligi iai le Agaga o le Atua, latou te ta'ita'i lona nuu. A lea ua iloa i upu o fai ma Matua o lenei Fono

Tele, atonu ua valetuulima le finagalo o le Atua, i le saofa'iga a le 'au ositaulaga, o toeaina ma ta'ita'i o le nuu.

Fai mai le Matua: Mulimuli ane, e iu ina ou liligi ifo ai lo'u Agaga i luga i tagata uma; ona perofeta ai lea o outou atalii ma o outou afafine, e fai miti o outou toeaina, e iloa faaaliga e o outou taulele'a (Ioelu 2:28a).

Ioe, afai ua le agatonu le nuu i le saofa'iga a tupu, o perofeta, o le 'au matutua ma toeaina o le nuu; o i latou ia sa liligi iai le Agaga o le Atua i aso anamua, e i'u a ina liligi ifo le Agaga i luga o tagata uma. E iloa ai ma vaaia ai e tagata uma le Agaga o le Atua. Ona perofeta ai lea o outou atalii ma o outou afafine. E fai miti o outou toeaina. E iloa faaaliga e o outou taulele'a.

A o aga atu le Ekalesia i le usuia o lana Fono Tele i lenei tausaga, a ua le po se lilo i le tele o fitaituga o loo ua faavaatu'ia ai le sa o le Ekalesia. E fesiligia foi i le 'au sinasina ma le pa'ia o toeaina malolo, pe na tupu muamua se mea faapea i o outou taimi? Poo taimi o o outou tuua? O a mea? Mea ia ua fai nei ma maa tuai, ma maagao ma maa faalavea 'a'ao i le sa o le Ekalesia.

E faigofie foi ona tau le pua ma lafo i le saofa'iga a le Laulau, poo le 'Au Toeaina, ma le 'au sinasina o le Ekalesia. Ona o mea ua le tau tamalii ma faaletonu. Ia, pe ona ua faalaulau toafa tuamaota o le Ekalesia i la le tino ma le Agaga, ona o sa tatou 'au'aunaga. Pe afai foi ua valetuulima le finagalo o le Atua i o tatou tofi ma tiute. Afai o lea, e le teena foi i so matou manatu se finagalo o le Ekalesia i lo matou vaivai ma lo tatou le atoa. O le a foi se ma'ema'e o se tautai, e le mafai lava ona atoa i'a i le liu o lona vaa.

Afai ua le atagia ma le vaaia le Agaga o le Atua i le soifua o le Ekalesia, tatou tatalo, o lenei Fono *faaauau itulau e 4*

---

## Manatu Autu o le Fono Tele 2016:

# “Vaaiga i le Agaga o le Atua”

*mai le itulau e 3*

*saunia e*

### Tupulaga Talavou Matagaluega a Malua

galuega a le Atua. E le itiiti le sao o Tupulaga Talavou, aua e maua foi le avanoa e faasoa ai i le Tala Lelei ma faaauuina galuega lelei a le Agaga, ina ia faatumauina meaalofa ua foa'iina mai mo le Ekalesia ina ia ola lana galuega tala'i e le gata i Samoa nei ae faapea atunuu i fafo.

I le faata'otoga la o lenei pepa, ua taumafai ai e faamanino le uiga loloto o le 'matagi' poo le 'Agaga' o le Atua, ma lona fesoota'iga ma le tagata soifua. Lea ua faatauaaina ai e le su'esu'ega vaega nei e lima, e ta'ialaina ai le soifua auauna o le tupulaga talavou i le Atua, e ala i le ta'ita'iga a lona Agaga; **faafouina, magafagafa, mataala, mafuta**, ma le **auauna**.

#### O le matagi e faafouina ai:

E mafua ona faafou ona ua tuai, elea ma ua le manaia i se vaai, e mafua foi ona faafou le mafutaga a le tagata ma le Atua, ona o le

tagata e agasala. O le matagi o suiga lelei, e aoga e faafouina ai le tama ma le teine talavou, ina ia ola e aga'i pea i luma. E le tau faailoa, o talavou, o le lumana'i o aiga, nuu ma le Ekalesia, ae faigofie foi ona iloa le talavou ua faafouina, i lana amio, tu ma le savali, a o talavou e auai i mafutaga eseese i totonu o le Ekalesia, i ona foliga vaaia. Ua le masino le televave o suiga ua afaina ai le ola o tupulaga talavou, a o le mau matagi eseese ua fetosoaina le ola sa faavae ai tupulaga talavou i aso ua mavae. E le leaga suiga, a o le talavou e sui ona ua faamoemoe, o le Atua e manuia ai faatasi ma lona ola tatalo, faatuatua, o uiga na e le mafai e faigata ma le mau faafitauli ona tineia.

#### ***O le matagi e faaosofia le ola magafagafa:***

A osofia le soifua ma le ola e le matagi o le Atua, ona loto atu lea o le tagata ma lagona i le loto le naunau e faataua ma famuamua ia te ia le finagalo o le Atua. O le ola magafagafa, o se lagona e tupu a'e i le loto o le talavou, ina ua mau'a ma mausali lona ola talitonu ma

faalagolago i le Atua i mea uma na te faia. O lona uiga, o le ola magafagafa, e tupu ina ua toto'a le vaai i le Atua, e afua ina ua faalogo ma usita'i le tagata i ta'iala ma alafua ua faasino mai e le Atua, ina ia tapasaina ai le ola ma le Malaga faale-faatuatua a soo se talavou ua ia te ia Keriso, e fai ma ona Faaola. O le ola magafagafa lea faa-tupulaga talavou o loo matauina i le soifua naunau o Iosua ma Kalepo ina ua auina atu e asiasi i le nuu o Kanana. O loo faapea ane ai i la'ua i le nuu o Isaraelu, “Ae aua lava ne'i outou fouvale i le Alii.....a o loo ia te i tatou le Alii; aua tou te matatau ia te i latou.” Ioe, o le soifua magafagafa, e le na ona faalogo, o talavou o le manuia o le Ekalesia mo a taeao, a ia magafagafa i ai, o le ola faaauu o le misiona a le Ekalesia, e faamoemoe i tupuaga. I le ma lea, ia aua lava ne'i avea suiga o le olaga e mafua ai ona ta'ita'i seseina le Ekalesia i le mea ua o latou manatu ua talafeagai ma o latou taimi. A ia faatupu pea le ola talitonu ma le faatuatua. “Ia OLA ia Keriso.”

---

## O LE LAUGA

*mai le itulau e 3*

Tele, a o lipoi ai upu o le Ekalesia a le Atua, ia iu ina liligi ifo le Agaga o le Atua i totonu o lenei fale: i luga o tagata uma, e le na o le saofa'iga a le 'au matutua; pe na o le 'aufaigaluega; a o tagata uma.

E perofeta ai o tatou atalii ma afafine; ma iloa e o tatou taulele'a faaaliga; ae fai miti o toea'iina; miti mo se Ekalesia manuia; miti mo se Ekalesia e suia lona alavaa i o tatou taimi. Ia o tatou maua foi le

loto tele e talia ai o tatou lava faaletonu. Ma loto tetele e faia faaiuga sa'o ma le amiotonu. Ina ia o tatou vaaia le Agaga o le Atua.

Ui i lea, o loo aumai ai foi ma le fe'au faamafanafana, ma le tala fiala. O le Atua, o le Atua alofa. Pei ona ta'ua i le fuaiupu e 2:13:

**“Ia outou saeia o outou loto, ae le o outou 'ofu, ma toe foi i le Alii lo outou Atua; aua e alofa fua, ma alofa mutimutivale o ia, e telegese lona to'asa, ua tele foi lona alofa.”**

Se tasi foi na o vaaiga i le Agaga o le Atua. Le Atua na te silafia mai i lo tatou le 'auga mo lana fe'au. E mafua ai ona oo mai lona aao malos i taimi e faatonu ai o tatou ala. A o le tala fiala lona ma le tala o le faaolataga: O le Atua alofa ma alofa mutimutivale. E telegese lona to'asa, ae tele pea lona alofa.

Talosia o le latalata mai o le Aso o le Alii mo tatou, e le o lona to'asa, a o se aso e toe fuata'iina ai lana Ekalesia, ina ia fai o tatou taimi, ma taimi o ni suiga lelei e viia ai le Atua, ma o tatou iloa toto'a ai lona Agaga, ma lona finagalo.

Ia manuia tele le Fono Tele. Amene.

---

## Manatu Autu o le Fono Tele 2016:

# “Vaaiga i le Agaga o le Atua”

*saunia e*

## Tupulaga Talavou

Matagaluega a Malua

### *O le matagi e faama'itea le mataala*

O le mataala o le faailoga o le talavou ola sauniuni ma tapenapena i soo se vai pana o le olaga. O lenei vaitau ma ona suiga, e matua taua ai le lagonaina e soo se talavou le matagi mai le Atua. O le matagi o loo momoli mai ai le finagalo paia o le Atua, ia nofo mataala le talavou e feagai ma lu'itau o suiga televavave o le olaga. E tele a'oa'oga a Iesu e faatatau i le taua o le ola sauniuni. I le faata'oto a Iesu i Taupou e To'asefulu, o loo matua faatauaina ai e le Alii Faaola le lava tapena ma sauniuni i soo se taimi ma soo se aso. O le fe'au faamalosi mo oe le tupulaga, e taua le ola mataala, aua o le fili e le moe. O suiga fou ua fetuleni mai, o loo o mai faatasi lava suiga lelei, ma faiga le lelei. Peitai o lou mataala e mafai ai ona e silafia ma manino lelei lau vaai e filifili ai ma le toto'a suiga e tataua ona o faatasi ma le finagalo paia o le Atua.

### *O le matagi e tupu ai le ola mafuta:*

Tasi lenei tafa o le soifuaga faatalavou ua tauau e mou malie atu mai le li'o faale-aiga, aemaise lava o le lotoifale faale-Ekalesia. O le ola mafuta, o le tasi lea a'oa'oga e faatauaina lava i le soifua faa-Kerisiano; e feaasoaa'i ai ma fefaamafanafanaa'i ai talavou. O se avanoa taua foi lea e faufautua ai faale-Agaga le aufaigaluega i tupulaga, aua o i latou ia o le a avea ma ta'ita'i o aiga, nuu ma le Ekalesia i le lumana'i. O lona uiga, a leai ni

mafutaga faa-autalavou, o lona uiga ua faigofie foi ona ofi mai le fili ma suiga le lelei e faatumuina ai le mfaufau ma le loto o tupulaga, ma o i tonu o le a alia'e mai ai faafitauli e le fia silasila iai i tatou uma. O lona uiga, o le ola mafuta e taulamua ai faafeagaiga, matai, matua ma i latou uma ua i le li'o o le Ekalesia.

### *O le matagi e totogo a'e ai le ola auaua:*

E le faigofie le ola fia avea ma auaua faamaoni, pe afai e le matua lagonaina e le talavou le papa'i mai i le loto o le matagi o suiga lelei. O le ola auaua e le faatali se'ia avea ma ta'ita'i o aiga, nuu, avea ma tiakono, a'oa'o pe faifeau, ona faato'a faatino lea. O le auaua i le Atua, e amata ona faaa'oa'o ai, a o avea ma talavou. O le upu lava a le Poto: “a'oa'o le tama e tusa ma ona ala, a oo ina matua, e le toe te'a ai lava.”

Tasi lea vaaiga o le agaga ua tatou manatu e ese ai le tupulaga EFKS mai isi tapua'iga. O le avea ma ta'ita'i faamaoni o le Ekalesia i le lumana'i, e amata mai lava i le taimi ina ua papatisoina seia oo ina avea ma tagata matua. O lona uiga, e tele ma taua le pitolaau faa-matua i le fofoaina o le ola faitaulaga, ma le ola tautua lotu o fanau. O nei ona po, ua tele a ta'ita'i ua faamoemoe i le poto salalau ma le tamao'aiga faale-tagata e faatino ai lona valaauina. Peitai o le talavou e faavae i le Atua lona ola auaua, e matou te talitonu, o le ta'ita'i ma le talavou pito sili lea ona ola ai aiga, nuu faapea le Ekalesia, nei ma le lumana'i.

### **AOTELEGA**

Ua sala ina fememea'i lagona ma manatu o Tupulaga Talavou, i nei aso, aua ua televave suiga aemaise

o le mau matagi esee se ua fetuleni mai. A o la matou taumafai atu, e le atoa foi se taumafaiga, ae matua atu i ina ia outou Susuga i Toeaina, Faafeagaiga ma faletua, aemaise o le lagolagosua a matua ma e matutua. Ina ia aua, aua lava nei avea nei suiga e fai ma faafitauli o le fofoaina o olaga o Tupulaga Talavou. E le toe tau faailoaina, ua tele faafitauli tutupu i lenei vaitau aemaise o le femisaa'i ai o tupulaga i le taulaga, faaopoopo tupulaga ua pule i o latou ola, aemaise o le faatuputupula'ia pea o fanau i le Toomaga mo e Puapuagatia.

Ua tele tupulaga ua le fiafia e auai i mafutaga esee se i Ekalesia, le Aufaipese, Autalavou ma le A'oga Aso Sa. Ae iai le talitonuga, o le Tupulaga Talavou e ola magafagafa, e mataala i suiga lelei, e fiafia e ola mafuta, ma ua faaa'oa'o i le ola auaua ma le ola tautua a o talavou.

Le paia e o le Fono Tele, ua auina mai e le Atua lona Agaga, e tauto'aluaina ma ta'ita'iina lo outou soifua mo lana galuega. E talitonu foi, o la outou a'oa'i ma le faatonu o matou tupulaga talavou, e manuia ai o matou olaga. Ia agalelei mai le Atua i le toe aso o lana Fono Tele, ia foi le tagata ma faalumaga mai le Agaga a ia faatumauina tupulaga talavou o le Ekalesia i Samoa ma le lalolagi atoa i le OLA IA KERISO.

## **Give Vilingly**

**An old German said  
in his broken English,  
'I likes to give  
villingly; when I gives  
villingly, it enjoys me  
so much I gives again.**

---

(George Fox: 1624-1691)

# O SIAOSI FOSI

## O LE NA IA FAASA'OLOTO LE AGAGA

*faaauau mai le masina o Aperila*

### O Ona Uiga Finafinai

E ui lava o le aiga o Fosi o se aiga ta'uleleia ma le faatuatuaina, e lelei foi a latou mea tau tupe, peitai o le soifuaga i lea vai taimi o le senituri e sefulu ma le fitu sa matua faigata lava. O tagata o ia vai taimi e le iloa tusitusi ma faitau tusi, e le mafaufau foi ma uiga pa'a'a. Sa matua tele mea e faaletonu o le soifuaga o tagata, faaletonu ma le tamao'aiga. Ona o le tamao'aiga la e le mautu lelei, o lea na faasaga ifo ai lava tagata o le nuu o Teleitone (Drayton) latou e fai mea mo latou, e aunoa ma le manatu i mataupu ma faafitauli i fafo atu o lo latou lava siosiomaga. E leai lava ma se tasi sa iai i lea aai to'afilemu na manatu o loo iai ia i latou se tasi o le a na luluina atoa Egelani.

E le fetai lava Fosi i lea ituaiga sosaiete, ma e le'i manatu mamafa foi iai. A o le sefulu tasi o ona tausaga na fetai'a ai ma se mea na ia ta'ua soo mulimuli ane o se "malamalama mai totonu" o Iesu Keriso. O lea malamalama'aga na a'oa'oina o ia ina ia savali i le olaga mama i totonu o mea leaga o si'osi'oina o ia. Na matua a'afia ai lona ola, mai lona matua e sefulu tasi tausaga, na mulimulita'i ai lava Fosi i lea malamalama mai totonu, ma faatupu teleina se'ia oo lava i lona oti. A o laitiiti lava o ia, na ia faia ai ni ana folafolaga se fa e ta'ita'iina ai lona ola:

i. O le a ola i se olaga mama ma le tonu.  
ii. O le a faamaoni i mea uma, i lona loto i le Atua, ma le vaaiga i fafo mo tagata.

iii. Ua ia filifili o le a ia tausi i le mea e tautala ai.

iv. O le a le 'ai tele pe inu tele.

Ina ua vaavaai atu tagata o lona aiga i ona uiga maumaututu i mea faaleagaga, ona u'una'i ai lea e i latou ona matua ina ia auina atu o ia e a'oga faafaifeau. Ae ou te talitonu e leai se faamoemoe o Fosi e a'oga e pei ona a'oga tama i le faafaifeau e pei ona ia vaai atu iai. O loo laitiiti lava o ia ae ua ia matauina le faaletonu o faifeau, ma amio faasalemausau, ma pi'opi'o.

E ui lava sa faigata ia te ia ona faaupu uiga o ia vaaia, ae na vave lava ona ia iloa, o le toatele lava o faifeau ua latou maua tofi ona o lo latou a'oa'oina ma tulaga aloa'ia o o latou aiga i le nuu, ae le o le valaau faaleagaga mai le Atua.

Na ave Fosi e ona matua ua faaa'oga fa'a'aperenitisi i se galuega e tusa o le afa itula le mamao mai lona aiga, i le taimi lea ua tusa ua sefulu ma le lima ona tausaga. Na galue o ia mo se tagata faiseevae e iai foi ni ana mamoe ma povi.

E ui lava o ia o se tagata mafaufau loloto, ae le'i avea lea ma faalavelave i ona tiute i lana galuega. O lona potu masani na maua mai i lona tausiga o tupe, alu i le maketi, ma femili ai ma le anoano o tagata eseese, na avea lea ma ala e sauniunia o ia mo faafesaga'iga ma soo se ituaiga tagata o le a ia galue ai i le lumana'i. Na potu ai foi i le faiseevae, o se mea na matua aoga mo ia i tausaga mulimuli ane ai i lona femalagaa'i i le fia selau ma selau o maila i lana galuega. Na matua sogasoga Fosi i le pisinisi

sa galue ai, ma e na solo lelei lava le pisinisi, ma manuia i le vai taimi atoa na galue ai Fosi. Na fiafia lava o ia ona o lona maua o tupe e tele mo lona pule, e aunoa ma sona faia o ni tau fa'imamago mo tagata.

O le faaaperenitisi i ia vai taimi e mo tausaga e fitu. Peitai, i le tausaga e 1643, e iai se mea na tupu ia te ia na fai ma mea na ia tuua ai faafuase'i le galuega ae ia savalia se ala fou.

### O le Valaau Faa-perofeta

Ina ua faasolosolo ina matua Fosi, na ia matauina lava le pepelo o amio a tagata o vaai ia iai. O Fosi e sau i se nuu sa latou u'una'ia le sa'olotoga o lotu ina ia toe fuata'i. O le mea lea, ina ua vaai o ia i ana uo ma o latou matua o auai i inuga 'ava le mafaufau, ma fiafia iai, o lea na matua faanoanoa ai lava o ia. E le malamalama o ia pe faapefea i nei tagata o loo talitonu i le amio mama i luma o le Atua, le inu 'ava se'ia oo ina matua 'onana lava ma le iloa se mea, ma alu ai a latou tupe e tele e faamalieleina ai o latou mana'oga leaga. Sa matua inoino o ia iai.

Sa tutu mamao o ia mai ituaiga tagata faapea, ma manatu ai tagata o ia o se tasi e le fia femili ma isi tagata. O lana lava masani, o le 'ai lea ma inu mo lona soifua maloloina, ma faatulaga foi ni aso faapitoa e anapogi ai ma faitau le Tusi Paia. O ona uiga ia na matua le malamalama ai lava le toatele o tagata.

O le sefulu ma le iva o ona tausaga na tupu ai se mea na avea ma ala na suia ai lona olaga atoa i ona tausaga mulimuli ane. O le tau mafanafana o le tausaga e 1643, na sui ai o ia i lona pule i le maketi, ae na latou fetai ai ma lona kaseni ma sa na uo. O la'ua ia e pei lava o Fosi le la lagolagoina o faiga faatoe fuata'i o le faatuatua. O lea na fai ane ai ia Fosi e latou te inua faatasi se sioki pia. Na malie iai Fosi. Ua vevela le aso, ua fia inu  
*faaauau itulau e 7*

(George Fox: 1624-1691)

# O SIAOSI FOSI

## O LE NA IA FAASA'OLOTO LE AGAGA

foi Fosi, ma ua fiafia ina ua feiloa'i ma lona kaseni ma lana uo.

O ia aso, o le inu 'ava malosi poo le uaina e le o se agasala ia i latou. O le 'ava malosi poo le pia i le vai taimi lea o le senituri e sefulu ma le fitu, o se mainu taatele e feinu ai tagata, pei o mainu suamalie i nei aso. Ae pei lava la o soo se mea, ia inu ma le fuafua tatau. Aua le soona inu e faaleagaina ai le tagata.

Ua ulufale atu nei Fosi ma le to'alua lea i le fale'ava, ua inu ai. Ae na uma loa paina pia muamua, ona fai mai lea o lona kaseni ma lana uo, latou te inu se'i iloa poo ai e muamua oti. Ma o le tagata e muamua iso, o ia lea na te totagia le latou inuga.

Na matua te'i Fosi i lea mea. O Kerisiano uma le to'alua lea, ma e talitonu la'ua i le ola fuafuaina lelei, a o lenei o le a tauva poo ai e muamua iso. Na matua vevesi ai lava lona mafaufau, i amioga a nisi o lana tupulaga. O se faaososoga tele foi ia Fosi. Na tu faafuase'i o ia i luga ma fai atu, "Afa'i o lona, fai la oulua a o a'u o le a ou alu." Ma tago lafo tupe i luga o le laulau ma savali loa i fafo e aunoa ma le toe tepa i tua.

E le'i mafai ona moe o ia i le po o lea aso. Na o le tagi, fesivalia'i, ma nofo ifo ma tatalo. I le taimi a o tatalo, na amata ai ona ia manatu a fia iai se suiga ma se faamoemoega fou mo le lalolagi, e tatau ona amata i lana tupulaga. O le 'au matutua ua faigata ona suia o latou uiga, ma augatata e osofa'i mea pi'opi'o a le lotu. E tatau ona ui mai ia i latou o le tupulaga talavou e pei o ia, e tutu

malosi atu mo le mea moni, ma latou alagaina le Atua soifua, ma faafesaga'i ma i latou - matutua pe talavou ua feoti o latou agaga.

A o savali o ia ma tatalo i le tuneva o le po o le taumafanafana, na ia faalogoina ai le si'ufofoga o le Alii o fetalai mai i lona loto, "Lea ua e vaai atu i talavou o o atu faatasi i mea le aoga, ma le 'au matutua i le eleele; o le mea lea ia e lafoa'i ai i latou uma, o e matutua atoa ma talavou, ma avea oe ma tagata ese i lo latou siosiomaga."

O upu na ia faalogoina na avea ma faavae o lona valaauina faavaloga. O le a avea foi lea ma faavae o le a fau ai i luga lana galuega faamisiona i le lumana'i. O le taimi lea na lagona ai lava e Fosi le to'a filemu o lona loto. Mo le taimi muamua i lona olaga talavou, ua ia mautinoa nei ua valaauina o ia e savali i se ala e ese mai i le mea e masani ai. E le'i tau manatunatu foi pe aisea ua ese ai ia mai isi tagata. Pau a lea, ou te talitonu, i lea lava taimi na ia iloa ai, talu ona fanau mai, ua iai i ona luga le 'a'ao o le Atua mo se fe'au, ma o se mea e le mafai e ia ona 'alo ese ai. O le mea mata'ina i lenei mea, e le'i taumafai Fosi e sola ese ai, a ua tuuina atu atoatoa o ia mo le fe'au.

### E iai 'ea se na te iloa le Atua?

Na o ni nai vaiaso talu ona te'a lea po, ae amata e Fosi ona tuliloa lana misiona. Na ia mautinoa lelei lava e talavou lava o ia ma leai sona poto masani. Na motusia e ia ona sootaga ma mafutaga uma, ae ia tuua lona aiga, ma ua fealua'i solo i vaega tuufua o le aai, ma saili i ni tali mo ana fesili.

Ae pei lava o isi perofeta uma, pe ua tagata matutua pe leai, ae na malamalama lava Fosi i le eseese o le mea sa'o ma le mea e sese. O perofeta e talitonu i le pa'epa'e atoatoa o se mataupu, poo le uliuli atoatoa. E leai se 'afa'afa. E tatau lava ona vevela atoatoa, poo le maalili atoatoa, ae leai se faaleogalua. O perofeta e tele ina latou mua'i iloa mea mai le lalolagi o le agaga, a o le'i iloina e isi tagata. O lo latou mautinoa manino o mea e tutupu mai na avea lea ma mea latou te galulue ai loa ma le naunauta'i ona o lo latou alofa i lo latou Atua ma filifiliga ai ina ia faataunuuna lona finagalo i le lalolagi e sili atu i se isi lava mea.

Sa inoino Fosi i le faailoga tagata o ona taimi, ona o le le amiotonu o lea faiga. Ona ia fuafuaina ai lea o le a faaali iai sona manatu. O le mea lea ua musu ai e 'oti lona ulu, a ua fai lona pulou, ma femalagaa'i solo i le nuu, ma ona lavalava fai soo ua avea ma mea e matauina ai o ia e tagata. Sa faanoanoa lava o ia i uiga o loo vaai pea i le nuu, ma tauivi ma ona lagona ma le tele o faafesili na te le o maua iai ni tali. Ua le fia femili ma tagata, faapaupau pe Kerisiano, ona o lona musu e aafia i mea o latou fai. Sa malaga mai o ia mai lea aai i lea aai, ma e le umi ona nofo i se aai, i lona tau saili i se tasi na te talitonuina o se Kerisiano faamaoni lea. I le pepa na ia faia na ia tusia ai e faapea: "Ou te le nofo umi, ona o lo'u fefe e le gata ia i latou o latou ta'uta'u le Atua, ae o latou foi o tauemu ma fetuu i le Atua, ne'i aafia a'u ia latou faamatalaga e fai."

**Wounded for me,  
Wounded for me:  
There on the cross  
He was wounded  
for me.**

---

## *O le Mafuaaga o le Pese:* **A Mighty Fortress**

Salamo 46:1-2: O le Atua, o lo tatou malu ia ma lo tatou malosi; e fai o ia ma fesoasoani silisili i puapuaga. O le mea lea tatou te le fefefe ai, pe a faaliliuina le lalolagi, ma luluina mauga i totonu o le sami.

O le aso 31 Oketopa 1517, e le taumate o le aso lea aupito sili ona taua i le talafaasolopito o Porotesano. O le aso lea na tu'ifao ai e Matini Luteru, o se monike o le Ituaiga o Aukusitino, ma o se profesa o

mataupu silisili, i faitotoa o le malumalu i Uitenipeka, (Cathedral of Wittenberg) i Siamani, ana Faitioga e Ivasefulu ma le Lima (Ninety-five Theses), e tetee atu ai i a'oa'oga ma amioga a le Ekalesia Katoliko. O lea mea na faia e Matini Luteru, na avea ma mea na fanau aloa'ia mai ai le Toefuata'iga Porotesano i le senituri e sefulu ma le ono, (The Protestant Reformation).

O le mau a le Toefuata'iga Porotesano, sa faavaeina i luga

o manatu e tolu:

\* O le toe faafo'i lea o le Ekalesia i mea oi le Tusi Paia

\* O le faamaninoga o uiga o le faaolataga

\* O le toe faia lea o viiga faa-faapotopotoga.

O le pese: "A Mighty Fortress" na tusia ma fatuina e Matini Luteru. Ua le mautinoa lelei poo fea tonu le taimi na fatuina ai e Matini le pese. Ae toatele lava e talitonu, na tusia mo le Diet of Spires i le tausaga e 1529 lea na ulua'i faaogaina ai le upu 'Porotesano'. Na avea lenei viiga e pei o se vii, poo se valaau mo tagata a le Toefuata'iga.

---

### **O le Pese: A Mighty Fortress**

*A mighty fortress is our God, a bulwark never failing; our helper He amid the flood of mortal ills prevailing. For still our ancient foe doth seek to work us woe-his craft and pow'r are great, and, armed with cruel hate, on earth is not his equal.*

*Did we in our own strength confide our striving would be los-*

*ing, were not the right Man on our side, the Man of God's own choosing. Dost ask who that man be? Christ Jesus, it is He-Lord Sabaoth His name, from age to age the same-and He must win the battle.*

*And tho this world, with devils filled, should threaten to undo us, we will not fear, for God hath willed His truth to triumph thru us. The prince of darkness grim-we tremble not for him;*

*his rage we can endure; for lo! his doom is sure-our little word shall fell him.*

*That word above all earthly pow'r-no thanks to them-abideth; the Spirit and the gifts are ours thru Him who with us sideth. Let goods and kindred go, this mortal life also; the body they kill; God's truth abideth still-His kingdom is forever.*

---

## **E Faafofoga le Atua i Lau Alaga mo se Fesoasoani**

O le tele lava o taimi e faitio tagata fai mai e leai se isi latou te sulufa'i iai i o latou taimi faigata, pe fai mai foi o le tagata na latou saili iai se fesoasoani e matua le aoga lava. Atula'i mai se faaaitauli ona latou manatu lea e matua leai lava se isi latou te sulufa'i iai. Fai mai o galuega lavea'i a leoleo ma isi e matua umi le taimi e faatali ai. Pe le o avanoa foi se isi e tali

mai. Ona e atuatuvaale ai lea ma e atili popole. Peitai o le olioli e te maua i le faatuatua faa-Kerisiano e faavae lea i luga o le mea moni, e alofa Iesu Keriso ia te oe, ma e na te le tuua oe, pe tuulafoa'i ia te oe. Tusa lava poo ai oe, poo fea foi o e iai, ia e nofo ma le mautinoa e alofa le Atua ia te oe, ma e le gata ina ia faafogaina lau tagi, ae sili foi ona malamalama o ia i

mea e te mana'o iai i lo oe.

Aua e te manatu mama i le malosi poo le paoa o talosaga, poo lona mana ma lona gaua'i mai e tali au tatalo. E le taumate e tele ina e le malamalama i ana tali, ae a e faatuatua ma talitonu moni ia te ia, o le mea moni lava, o le a ta'ita'iina oe e ia i ona ala - o ala o le manuia mo oe.

Iona 2:2: *Na a'u valaau atu i le Alii ona o lo'u puapuaga, ua na faafofoga mai foi ia te au; na ou alaga atu nai le mea maualalo i tuugamau, ua e faafofoga i lo'u leo.*



---

# Amata le Fono Tele i le Sailia o se Failautusi Aoao

*mai le itulau e 2*

le ma'ema'e le galuega sa faia e le Susuga Rev. Vavatau mo A'oga a le Ekalesia.

Faanoanoa foi le Komiti o A'oga, ina ua tuua le tofi Ta'ita'ifono o le Komiti o A'oga, e le Susuga Palemia Tauiliili FS, ua 24 tausaga o iai i lea Komiti a le Ekalesia, e aofia ai ma tausaga e 14 sa ta'ita'ifono ai. Ina ua filifilia o ia e avea ma Faifeau Toeaina Pulega a Gagaemauga, Matagaluega Itu o Tane. Peitai, o tatou lava o tagata faigaluega a le Alii, a valaauina

lava i soo se galuega e finagalo iai le Matai, tuu loa le galuega o fai, ae alu, ma le faafetai i le Alii ona o lo tatou valaauina.

O le amataga lena o le Fono Tele i lenei tausaga. A o le faaiuga o le Fono Tele i le Aso Faraile na fai ai le palota e pei ona masani ai, mo le Laulau a le Fono Tele. Ona ua malolo penisione le Susuga i le Toeaina Faatonu o Tavita Roma, o lea na le toe lavea ai i le palota.

E toatele foi sui na faatutu atu i le palota muamua, ma silafia ai e sui usufono i latou o le a ave iai a

latou palota i isi palota o le a fai mulimuli ane.

Peitai, i le palota muamua, o i la'ua e toalua na sili a la palota, o le Susuga i le Toeaina ia Tunumoso Soliola Iosia, e 269 ana palota i le 248 a le Susuga i le Toeaina o Palemia Tauiliili. Ina ua toe fai le palota na manumalo ai Tunumoso Soliola Iosia e 337 ana palota i le 320 a Palemia Tauiliili.

O le Susuga ia Tunumoso Soliola Iosia, mai le Matagaluega a Falealili Safata Siumu, ma o le Faafeagaiga a le Ekalesia i Sapoe'e, e le'i atoa se tausaga pe a talu ona avea ma Failautusi o le Komiti a le 'Au Toeaina ina ua malolo le Susuga i le Toeaina o Kerisiano Soti ina ua penisione.

O le Susuga Palemia Tauiliili o le Faafeagaiga a le Ekalesia i Samalaeulu, faatoa faamaonia i le Fono Tele o le tausaga nei lona tofi Faifeau Toeaina, e sui i le Susuga i le Toeaina o Solinuu Pa'iaua ua maluu.

---

## Faamaoni i Nai Mea Iti

Na ma taamilomilo i nisi o alatele o le aai ma lo'u toalua e saili se mea e paka ai le ma taavale. Na oo ina paka i si avanoa laitiiti lava i se vaifale. Ua ma le lavava i le ma faatauga na fai. Ua paka le taavale e lo'u toalua ona alu lea ae ou faatali atu i le taavale.

Na ou vaai atu ua savali ane se toeaina ma tulei ane se taavale lea e tuu ai faatau a tagata e fai i totonu o le faleoloa (trolley). O loo i totonu o le taavale se pepa lapo'a e tuu ai i totonu faatau, ma se tama'i afifi. E ui lava e mafanafana le aso, ae o loo ia ofuina se talaloa mafanafana e gata i ona tapuvae. E le taumate o se tasi o tagata 'aisi o le aai ia e nofonono i lumafale o faleoloa ma 'aisi ai, ma faafafa solo a latou meatotino, pe tuu foi i totonu o taavale faatau a le faleoloa, ma tatoso solo. Na tu le tuleiga taavale a le tamaloa i tafatafa o se paelo lapisi, o loo salalau ai i autafa ni lapisi. Na taetae lelei uma e le toeaina le otaota ma tuu i le paelo lapisi. Ona tago lea i se laau puupuu e pei o se lou, ua lou a'e ai

se napekini ma tuu i le taavale. Na mulimuli ona ia taetae o atigi'apa o salalau solo, ma tuu i totonu o le taavale.

Na faasolosolo ona tae otaota le toeaina i lumafale o isi fale, oo atu i vaega ou te le iloa atu. Ae toe fo'i mai lava ma tuu ana lapisi i le paelo lapisi lea e lata mai i le ma taavale. A mae'a, on toe 'etu'etu fo'i lea ma aga atu i isi vaifale ma vai'auala.

Na ou vaavaai ma le toto'a i le mea lea o fai e le toeaina, ma ou maofa ai. E le taumate o se fasi tupe itiiti na te maua mai le galuega faatauvaa, ae taua, o ia faia, o le tae otaota ma le faaputu atigi'apa i le paelo lapisi, e matua taua lava mo lona ola i aso ta'itasi. O lapisi a tagata e le manatu mamafa i le soona lafoa'i o a latou lapisi ma mataga ai le aai.

O lenei lesona na ou vaai iai na faia e se tagata e le taumate lava le mativa, ae na ia faato'aga ona fai, ma le leai o sona manatu e amana'ia o ia e tagata o loo feoa'i ane ma manatu mama ia te ia. Na ia faia ma le faamaoni le galuega

na ia maua ai ana tupe.

O le faamaoni lea na fetalai iai le Alii i se taimi ua silia ma le 2,000 tausaga talu ai: "O se faamaoni i mea iti, e tofia o ia e pule i mea e tele."

A na tele ni atigi'apa o vaiinu suamalie i le matou piki'apu, ou te aoina ma ave uma ma le toea'ina. A o le mea na ou fai, o la'u tatalo lea mo ia, ma la'u faafetai ona o le faata'oto e leai ni ona upu na ou vaai iai, i se magaala o le aai, na faatino e se toeaina mativa e le amana'ia e se isi.

tusia e Florence Ferrier  
faamatalaina e

Afemata T.Apelu Aiavao

---

### WITNESS

**Make me a witness, Lord,  
So faulty I and weak,  
My trembling word can scarce be  
heard,  
So loud my failings speak.  
Make me a witness, Lord;  
Subdue my will to Thine  
That, led by Thee, in meek accord,  
My lamp may brightly shine.**  
*by G. Alexander*

---

---

## A Page for Youth

### ITULAU MO TUPULAGA TALAVOU

---

#### *O le Palealii*

I se tasi o Taua Pa'ia a nisi o atunuu Kerisiano i Europa (Crusades) i ona po anamua, i se tasi o vaega'au sa ta'ita'i ai le tupu o Falani, o Filipino Aokuso (Philip Auguste). A o sauniuni atu o ia i se tasi o taua, na tago atu i le palealii o i lona ao, ma to ese ma tuu i luga o le laulau o tusi ai upu - 'Au plus digne' - mo le e sili ona

fetaui iai, ona fai ai lea o lana lauga, e pei ona masani ai ta'ita'i'au i ia vai taimi a o sauniuni atu i se taua. Na faaali atu e ia i ona tamalii, fitafita totoa, atoa ma fitafita uma, ina ia faagalo ia i latou o ia o lo latou tupu ma le ta'ita'i'au, a ia latou manatua, o le palealii, lea ua ia tuu i luga o le laulau, o le taui lea, poo le faailoga lea o le a tuuina atu i le fitafita e aupito sili ona sili ona lelei o lana tau, loto toa, le fefe, ma aupito sili

ona tele o lona sao i le manumalo o le latou autau i le taua.

Na sii le taua, faataunuu le taua, ma toe fo'i mai le autau ma le manumalo. Ona tumutumu ane lea ma si'osi'o le laulau o loo iai i luga le palealii. Ua leai ma se e pisa, a ua tutu ma feva'aia'i. O le taimi lea na savali atu ai se nopele, to mai le palealii, ma savali atu aga'i i lo latou tupu, ma faapale ai le tupu, ma fai atu: 'Tu, O roi, es le plus digne' (Thou, O king, art the most worthy) - *Lau Afioga, lo matou tupu e, o oe lava le e sili ona matua fetaui iai.*

---

#### Tupulaga Talavou ma le Tamao'aiga

O Sir James Falshaw, (Semisi Folosoa) sa ta'ita'ifono muamua i le kamupani o nofoaafi e ta'ua o le North British Railway Company. O ia o se uo mafana a le tupu tama'ita'i o Vitoria. O Semisi Folosoa o se tagata e lelei tele i mea tau tupe, ma o se faipisinisi mauoloa. Na fesiligia o ia a o ia auai i se 'aiga tele na fai e

aloa'ia ai lona ma'ema'e i mea tau pisinisi, ina ua atoa le 80 tausaga o lona soifua. O le fesili na tuuina atu ia Semisi, "Atonu e aoga mo alii talavou uma o loo auai mai i lenei po, o tagata e le taumate e tauva ina ia faamanuiaina a latou pisinisi. E iai se mea i lou soifua galue, se mea lava mata'ina, e mafai ona tusi iai lou lima ma e fai mai, o le mea lilo lea le mafuaaga o lou tamao'aiga?"

Na tu i luga Semisi, tu faasasa'o pei se fitafita ma tali

mai, "E faigofie lava ona ou tali atu i le fesili. O le a se tamao'aiga ua ou maua, manuia, ma le faaeaina ua faafaula'i mai i o'u luga, ou te manatu e mafua ona o le mea lenei, na ou tuuina atu lo'u ola i le Atua ina ua faato'a sefulu lima ou tausaga."

Failauga 12:1: "O lenei, ia e manatua le na faia oe i ona po o lou taule'ale'a...."

Faata'oto 23:26: "Lo'u atalii e, aumaia lou loto ia te a'u, ma ia fiafia ou mata i o'u ala....."

---

#### O le Galuega Alofa mo lou Tua'oi

O ma'ua ma lo'u to'alua o Hanoka, na ma tusia se tusi, Acts of Kindness - O Aga o le Agalelei - na faatupuina ai le fiafia i le toatele o tagata o Amerika. O le tala la lenei ua tusia atu, na matou talanoa ai ma se tasi na vili mai i le polokalame e mafai ai ona talatalanoa i luga o le leitio i Sikako (Chicago). O se tala i se ma talanoaga ma la'u tama teine.

"Hai Mama! O a au mea na e fai? o le fesili lea a la'u tama o Susi.

"O lea e kuka la'u pai e ave ma le tatou tuaoi o Misi Simiti"

"Aisea? o le fesili lea a Susi, e na o le ono ona tausaga, e le malamalama pe aisea o le a ou faia ai fua le pai ma Misi Simiti.

"Leaga ua faanoanoa lava Misi Simiti, ona ua oti lana tama teine ma ua ta'e ai lona fatu. Ua nuti! E lelei le tatou fesoasoani ia Misi Simiti, se'ia oo ina te'a lona faanoanoa. O Misi Simiti o le tatou tua'oi. Tatou alolofa iai. E le toe mafai ona toe talanoa Misi Simiti i lana tama ua oti, e pei ona ta talanoa, a 'ea Susi? Atonu e mafai ona e mafafau i se mea e mafai ona e fesoasoani ai ia Misi

Simiti."

Pe na o se itula talu ona talanoa Susi ma lona tina ae alu i le tu'itu'i i le faitotoa o Misi Simiti. E le'i umi ae tatala mai le faitoto'a e Misi Simiti, vaai mai ma fai mai, "Oi Susi! Talofa!"

Na vave lava ona iloa e Susi e le o fiafia foliga o si o latou tuaoi, e pei ona masani ai. E mumu ona mata e pei sa tagi.

"E iai se mea na e sau ai?" O le fesili lea a Misi Simiti.

Na tali Susi, "Fai mai lo'u tina ua oti lau tama ma ua e matua faanoanoa ai lava, ma ua ta'e ai lou fatu. Na ou sau ma le mea faapipii faaauau itulau e sosoo ai

---

# O Leo o le Ekalesia i Lu'itau o le Soifuaga

saunia e

**GALE S. GALE**

Tiakono Vailoa Uta -Faleata - mo  
le Mafutaga Matagaluega Apia  
Sisifo - Iulai 1994

E lua ni autu ua tuuina mai e  
'au'au iai lenei pepa.

1. O le leo o le Ekalesia i  
lu'itau o le soifuaga ua feagai ai i  
lenei vaitau.

2. Pulega Faa-matai - O le a  
le tuaoi i le va ma le Ekalesia?

O le Sini:

i. Ia le gugu pe solomuli le  
molimau a le Ekalesia e faafetaia'i  
lu'itau o le soifuaga ua feagai ai  
ma le fanau a le Atua i nei ona po.

ii. Ia silafia ma mautinoa e le  
Ekalesia le eseese o a la  
matafaioi ma le Faa-matai.

iii. Ia tu le Ekalesia aemaise  
faifeau i matagi'olo e tali pulufana  
a ia ola tagata.

E 'a'apa i le tata ina ia tuu ititiia  
le sualiu o le vaa ae popo'e ona o  
se vaivaiga i le taofi, o lenei  
mataupu, e talafeagai lelei i se  
Faafegaiga o le Matagaluega. Ui  
i lea, o le a tausosoo pea ia ni nai  
motuga afa pe ono faaaoga mo le  
galuega.

O le a afua se faamatalaga i le  
upu "Ekalesia". Le Ekalesia  
Faapotopotoga Kerisiano Samoa.

E pei ona silafia, e ese le auala e  
pulea ai le Faapotopotoga  
Kerisiano nai lo le Katoliko Roma  
ma le Ekalesia Metotisi, atoa foi  
ma le tele o isi tapuaiga. E tasi le  
leo e fai mea faalogo iai le Ekalesia  
Katoliko, na o le Pope. O le  
Metotisi e faauluulu i le  
Peresetene.

Ae a le Ekalesia Faapotopotoga  
Kerisiano? E fau ana faaiuga i le  
tofa ma le faautaga saoloto. E leai  
se pa vaeloto e faavaatu'ia ai  
finagalo faaalua aua e saoloto. E  
saoloto le gagana. E saoloto leo.  
E saoloto foi aga faa-Kerisiano.  
Ua talafeagai lelei lenei vaega o le  
Faavae o le Ekalesia aua e le'i afio  
mai Keriso ina ia saga saisaitia ma  
fusifusia pea le fanau a le Atua, a  
ia saoloto.

**AUTU: (i) - O le leo o le Ekalesia  
i lu'itau o le soifua ua feagai ai i  
lenei vaitau.**

E anoanoa'i lu'itau o le soifuaga  
o loo feagai ma le Ekalesia i ona  
po nei. Taatia le tele o ia lu'itau  
ne'i fai ma ala e faaumiumivale ai  
le taimi taua o le Mafutaga. Ua  
oto mai na o manatu ua faaalua i  
lalo o mea o loo tutupu, e fai ma  
lu'itau i le Mafutaga a le  
Matagaluega, ma tatou mafaufau  
faatasi iai, i ni auala talafeagai e  
momoli atu ai le leo o le Ekalesia  
e faafetaia'i ma fo'ia ai ia

faafitauli.

(1) Ua faatuputupula'ia pea le  
faitau aofai o uso ua liliu i isi  
tapua'iga.

(2) "Pule i le Ola". Ua numera  
tasi Samoa.

(3) Se sao o le Ekalesia i uso  
matitiva.

Afai ua faatai fana'e le tutupu ma  
alia'i mai pea o nei to'atuga i olaga  
o tagata, o le a se leo o le Ekalesia  
i ia mea? Tau 'ea ina iloa ma tatou  
manatu: 'O mea lava e masani ona  
tutupu i le gasologa o le olaga?'  
Ua lava 'ea le iloa o aafiaga o ia  
uso, e fai ma autu o suaga ma  
tauemuga i fesagoa'iga ma  
faanofogofie ai faasausauga? E  
moni 'ea le mau: 'O le Ekalesia  
Faapotopotoga, o le Ekalesia  
saoloto?' Afai e moni, ae aisea e  
liu lotu ai? Aisea e pule ai i le ola?

E foliga e iai lava se mea o misi.  
Ua fia o ese e a ma le lotoa nei  
mamoe? O a ni mea oi le lotoa ua  
mafua ai? O fea tonu o iai le vao  
mu'a ma vai e tafe lemu? Ua pule  
e a i le ola? E mafai ona faatino  
lenei laasaga e se tagata loto  
malie? Pe ua uia lenei auala ona o  
le ola ua saisaitia ua le maua se  
saolotoga? Le ola a tatou lailoa e  
putiputi ma faapelepele ona o le  
maoa'e o lona taua e le mafai e  
tupe ona faatau. E mafua ai ona  
faapafala tiute taua ma fe'au aoga  
ae tili se gasegase tigaina i le  
falemai pe ausulusulu foi e saili  
faatapito se taulasea. Le ola ua  
tatou ave iai le faamuamua. Ae  
aisea lava ua faigofie ona pule ai?  
Ua iai se faalapotopotoga o loo  
feagai ma ni taumafaiga e tau fo'ia  
ai lenei faafitauli? Ua faia foi e  
tamaitaisa o le Ekalesia Katoliko  
Roma se galuega alofa mo lea lava  
faamoemoe. O le a se leo o le  
Ekalesia na mua i malae i lenei  
mea? O fea tonu e tatau ona ave

*faaauau itulau e 12*

---

## O le Galuega Alofa mo lou Tua'oi

lea e faapipii ai le mea lenei ua ta'e  
o lou fatu." Ma faalala atu lava le  
lima o Susi o loo 'u'u ai le mea  
faapipii, a ua tau taofiofi loimata  
o Misi Simiti, faano'uno'u ifo i  
lalo ma fusi atu Susi. Ma fai atu,  
"Susi, faafetai tele lava! E tele lava  
le aoga o lau mea faapipii i lo'u  
loto faanoanoa. Faafetai lava."

Na talia ma le fiafia e Misi Simiti  
le aga alofa o Susi, ma alu ai ua  
faatau se mama fuifui ki e iai ma  
se tama'i faavaa e tuu ai se ata.  
Ona tago lea ua tatala le faavaa ma  
tuu iai, e le o se ata e pei ona  
masani ai, ae o le mea faapipii na  
alofa atu ai Susi ia te ia. Ua avea  
lea ma fesoasoani tele ia te ia i ona  
mafatiaga ona o le oti o lana tama.  
tusia e Meladee McCarty,  
faamatalaina e  
Afemata Apelu Aiavao

---

# O Leo o le Ekalesia i Lu'itau o le Soifuaga

*faaauau mai le itulau e 11*

iai le faamuamua o le galuega a le Ekalesia?

Tatou te taufai lagona uma le fiafia atoa ma le agaga faafetai ona o atina'e lelei ua faia e le malo, kamupani, itumalo, nuu, faalapopotoga, aiga ma tagata taitoatasi. O le a le faamoemoe maua o nei atina'e? A o le a le manulauti o atina'e a le Ekalesia Faapotopotoga? E faapefea ona faatino? O ai e faatinoina? E fai ona o ai? E fai mo ai?

E le o Europa poo Asia poo Amerika o tutupu ai nei mea. O mea lava o loo tutupu i o tatou tafatafa, e le alu ai ni tupe e tau totogi ai se pasese mo se galuega lavea'i. Ua foliga mai e faatutugata la tatou galuega lavea'i. Ua faataligatuli a'oa'o, tiakono, ma le Ekalesia, aemaise faifeau.

O loo ululu matafolau tama'ita'i ma alii talavou e oo i tina matutua i maota ma laoa, ma soo se nofoaga, ma 'ato laufala e tumu i tusi laiti e foliga tusaafia, atoa ma upu faagau loto, e faatosina atu agaga o tagata ia latou tapua'iga. Tatou te manatu mama ma faa'amu'amu i ia o tatou uso. E teena foi latou i nisi aiga. E fai foi i latou ma ulagia a nisi. Ao talavou na, ma loomatutua na, ma 'ato laufala na, ma tusi laiti na, ua avavaga atu ai le tele o agaga. O le faapogai moni lea ua faaptupu'ia ai pea lava pea le pa'u ifo o le pasene o le faitau aofai o tagata lotu o le EFKS.

E le tatau ona tatou faitioina nei talavou ma nei tina matutua ma tatou nofonofo, ma siisiigata pea o tatou fala, ma 'apo'apo pea o tatou pa'ia, ma taulagi o tatou mamalu.

O le gagana masani a se uso e liliu atu i se isi tapua'iga: "Faato'a ou maua iinei le mea moni." O le fesili ua tula'i mai e tusa o lenei

faaupuga, "A o a ea la mea e fai i 'ila?" E aliali mai i lea faaupuga, o le gagana a le tagata e le malamalama, faato'a malamalama ina ua taunuu i 'inei!

Le paia e o le Matagaluega, pe le o se lu'itau tele 'ea lenei mo i tatou?

Ua a'e i fanua tiuga ma faatamasoaliiga a Susuga i Toeaina ma le nofo a Faafeagaiga a le Matagaluega, ma mau o faiva ia latou tiuga i le Kolisi Faafaifeau i Malua. Ua a'otauina foi i le Mataupu Silisili. O sa ua mafa totoga e faafetaiai fita o le vasa. Faamata ona o le le malamalama 'ea o le tagata i lana tapua'iga, se isi mafuaaga ua liliu ai i le la tapua'iga? O le a la se leo o le Ekalesia i lea mea? Pe tuu pea ia ona pau lava o lo latou vaivai? Afai e vaivai, e le maua i se a se faamalosia'au?

Afai foi e le o lea, a o a la nisi mafuaaga? E iai le talitonuga, e iai isi mafuaaga. O mafuaaga na ua matua tatau ona maua ma liuliu malie iai le tofa loloto ma le moe oooo i ni auala e fo'ia ai. Fai mai se tama matua i lona atalii, "To'aga e faa'oga tamaiti. E leai se atinae sili nai lo o le atina'e tagata." Le fanau lena ua sikolasipi uma tama ma teine matutua, ae foliga mai e oo foi iai le toatolu laiti, aua o loo a'oga le isi o le toatolu lea i le Tausaga Faasauniuni a le Iunivesite i Malifa a o le isi toalua i le Kolisi a Samoa i Vaivase. Tatou te ioeina uma le fautuaga a lenei tama matua.

E 'ave'ave lava le 'a'asa o se pisinisi ae iai le taimi e fai ifo ai, pe i'u lava foi ina gau. A faamoemoe foi i faiga faiva, e iai taimi e faaletonu ai le tau. Tele tausaga o tatou faamoemoe i faatoaga. Agi loa 'Ofa ma Valelia, leai se koko ma se popo. Sosoo ma le lega, mou atu le talo.

E tua matua i fanau, e tua le matai

i le 'au'aiga, ae tua le Ekalesia i tagata lotu. A to'a gaogao se aulotu, e gaogao foi ana mea e fai. A leai ni tagata, ona lumafale lea i le moana ma tua i le papa le Ekalesia.

E momoli atu ai le faamalo ma le faafetai tele i Susuga i Faafeagaiga o loo ave le faamuamua o le galuega i le atina'ega o le palealii o galuega a le Atua, e le gata i le itu faaleagaga a o le itu i fafo. Ua tatau foi ona mafaufau i auala e fesoasoani ai i tagata lotu e 'uti'uti lo latou tamao'aiga. O a ni nai atina'e e tatau ona faatino e fesoasoani ai ia i latou. O nai taumafaiga na, a faamanuiaina e tua iai tagata ma faaleleia ai le itu i fafo o le galuega a le Atua. O iloa e ai pe le o se isi lea o mafuaaga ua liu lotu ai. Ua tau mai tua tau mai alo, e fa'i o faalavelave faaleaiga, o faalavelave faalenuu, o a'oga a le fanau, a o mea faalelotu, aemaise lava i nei ona po, ua pa'u maualalo le tamao'aiga o le atunuu ona o afa ma le lega. O le a la se leo o le Ekalesia i lenei faafitauli ogaoga ua aafia ai tagata lotu? Faamata e ono fo'ia? O le a se vaifofo? O ai la le faitoo? Faamata e le ui le ma'i?

Autu e (ii): Pulega Faamatai: O le a le tuaoi i le va ma le Ekalesia?

Ua uma ona faailoa i le Autu (1) auala e pulea ai le Ekalesia Faapotopotoga Kerisiano e pei ona silafia ma tatou iloa. E le pulea e se toatasi. E fai mea faalogo i iugafono a le Fono Tele. O iugafono na fau i finagalo saoloto ma siufofoga saoloto e tele. O lona uiga e temokarasi le EFKS.

E le faapea le faamatai. E le sa'oloto leo o matai uma e filifili ai se faaiuga o se mataupu. E iai matai, e iai foi vai matai. O matai e alala i pou, a o vai matai, e  
*faaauau itulau e 13*

---

# O Leo o le Ekalesia i Lu'itau o le Soifuaga

*mai le ituau e 12*

nonofo i vai pou. Ua iloga foi tumutumu o nuu, o tamalii ia e aliita'i afio'aga ma tulatoa e puipuia tapanu, le faleupolu, maota ma tupua, nuu ma itumalo, i le va i fafo ma fale, i le vagatai, vagauta, vagavao ma le vagatootoo.

O pulega faamatai i paea'iga ma afio'aga, e le sa'e se vae, e le fesopoa'i foi le uto ma le maene aua o paia ma mamalu ua uma ona tosi faalauti, o le niu ua uma ona ta tulaga, e le se nuu taliola, o Samoa o le atunuu tofi. E tala tau Toga ae tala tofi Samoa. O le atunuu e mama'e i ona paia ma ona mamalu ma ana measina. O ia paia ma mamalu ma nei measina o loo i le vaaiga ma le tausiga a matai. A leai ni matai, ua tafea loa pulu i vai. E mou paia ma mamalu. E tofatumoanaina measina. E tafea i le auu a ta tu ma aganuu o ta sapi ai nei ona e foetuese ai Samoa i lo o isi atunuu o le lalolagi.

A alofi alii ma faipule e lauiliuina se mataupu i se fonu, e le tofi sao uma i le filifiliga ma le soalaupulega o se faaiuga o le mataupu, pe fonu fale pe fonu fafo. Afai o le nuu e tolu fuaiala, e ui ina toatele matai i se fuaiala, na o le toatasi lava le matai faiupu o fuaiala i se fonu. O lona uiga, o le nuu leni e tolu fuaiala, pe aso ato o filitagaga le liliuga o le tofa mamao ma fautaga oo, na o le tolu lava saunoaga poo fetalaiga i le fonotaga. O isi matai uma, e faia le faiva o Fiagafale, o le taputapua'i. O le tapua'iga e osi gugu. E leai foi se matai o se fuaiala na te fautuaina lo latou matai faiupu, vagana se matai la te tumua'i tutusa i tulaga. E le mafai foi ona suimomo'eina le matai faiupu e se isi matai vagana lava foi o se isi suafa matai e tutusa o la tulaga.

O faavae o nuu, o faavae papa.

E le mafai e se malosia, le potu poo tupe ona toe suia. O faavae ua uma ona tuulaupua ma tuuautapu e le au puputoa ma le au talaia ua tofafa mai tia. E faapea foi i faavae o itumalo ma le aoao tetele o Samoa. E ono fesuia'i faiga ma aga a o faavae o nuu, itumalo ma Samoa mai le vavau e tumau pea lava. E le pei o faavae o malo, Ekalesia ma faalapotopotoga e mafai ona toe iloilo ma fesuia'i ni vaega mai lea taimi i lea taimi.

E vevele tupua ona ua otaota ma vaoa, e muai aami e le matai lona auai ma saili ma suesue maea pe le o se isi o i latou e faapogai ai le fonu. O fonu usu tootoo nei e atuatuvaale ma popo'e iai tagata uma aua e mafua ona se agasala matuia. O fonu manu ia poo fonotia, ae taatia ia fonolulua ma fonotalaga. O nei fonu uma e tapu lava se tagata e le iai, vagana le tinifu. O nisi o fuaitau masani pe a tu se ati i aso o nei fonu, "Ua sa le sami, sa le laueleele, ua sa foi le vao." E leai se e faafia 'a'ale i ia fuaitau. E oo lava i malaga e onosai lava ma faamamalu ma tapua'ia le liliuga o le tofa ma moe seia sausi ona faato'a faauau ai lea o le faiga malaga.

O faasalaga i se Fonomanu poo se Fonotia, o ni faasalaga e ogaoga ma ulua. Ua le o toe faatinoina nisi: o faasalaga matuia sa masani ai Samoa i ona poo o le vavau. Peitai o loo iai lava faasalaga mamafa e le mafai e le toatele o tagata ona amo.

E ui ina eseese auale e pulea ai le Ekalesia Faapotopotoga ma le Faamatai ae ao ina manatua le sao taua o matai i le Tala Lelei. O matai na talia ulua'i misionare na aumaia le Tala Lelei i Samoa na mafua ai ona faigofie ona talia e tagata. O loo vaavaalua pea le lotu ma le aganuu. O matai o loo toomaga iai le Ekalesia i le itu i

fafo o le galuega.

O matai o atua o le lalolagi, e fai ma faamata'u i e amio leaga. E tausisia e matai tu ma aganuu a Samoa, ae tulituafulu e le Ekalesia mataupu tau le Atua ina ia maua e tagata le ola faavavau.

## Tuaoi i le Va o le Faamatai ma le Ekalesia

E manatu ua lava nai faamatalaga ua folasia e uiga i le eseese o nei tino e lua ma a la matafaioi faapitoa. E iai nai fesili atonu e ono laga ai finagalo ma maua ai se faaiuga i leni mataupu.

1. O le a le tulaga o le Ekalesia i le va feagaiai ma le Faamatai?
2. E tataua ea ona aiaina e le Ekalesia pulega Faamatai? Aisea?
3. A va le fogavaa i le pulega a matai ma tulai mai ai ni fita e save'u ai le nofo lelei o tagata, o le a se sao o le Ekalesia? O ai e fai ma leo o le Ekalesia? E faapefea ona faatino?
4. E iai ni afio'aga ua leva ona masesei ae foliga ua gugu lava le Ekalesia? O le a le mafuaaga?
5. I se faaiuga a le Pulega Faamatai e afaina ai le soifua ma mea totino a tagata, o fea e tu ai le Ekalesia?
6. E iai la se tuaoi i le va o le Pulega Faamatai ma le Ekalesia?

---

## Faaau'upega Oe e Ala i le Faatuatua

O le talafaasolopito o le lalolagi e tumu i taimi pogisa. A le o le matua leaga o le tamao'aiga ua mafatia ai le afe ma afe o tagata, o ni taua e maliliu ai se faitau fia afe tagata. E ola fefefe tagata ma latou le maua se sa'olotoga. E sauaina i aso uma. E nofo i le pologa ma ola ma moe i le pologa mai sauaga o faiga malo. E leai se faamoemoe  
*faaauau itulau e 15*

# O le Afā i le Salamo e 107:23-32:

O i latou o e folau i vaa i le sami, o e fai galuega i le vasa tele; o i latou ia latou te vaaia galuega a le Alii, ma ona vavega e fai i le moana. Aua ua fetalai ane ia, ma faatupuina le afa, ua laga ai ona peau; e o a'e i latou i le lagi, e toe o ifo i lalo, ua liu suavai ai o latou loto i le atuatuvaile; e tautevateva i latou ma tausuai pei o le tagata ona, ua faaumatia foi o latou atamamai uma lava.

Ona latou alalaga atu lea i le Alii i lo latou puapuaga; ua ia aumaia i latou nai o latou tiga. Ua liua e ia le afa i le malu, ua taoto ia te ia le au peau. Ona latou fiafia lea, aua ua malu; ua na ta'ita'iina foi i latou i le taulaga na latou loto iai.

Ia vivii atu i latou i le Alii ona o lona alofa, ma ona vavega na fai i le fanau a tagata. Ia latou faaneenee ia te ia i le faapotopotoga o le nuu, ma ia vivii atu ia te ia i le saofa'iga a toeiaina.

I se afa e pei o lea o loo faamatalaina i le Salamo e 107:23-32, na lagona ai e le alii o Ioane Niutone (John Newton), le alofa anoanoa'i o le Atua. Na matua lauiloa lenei tagata i le faaaogaina o upu masoa i lana tautala, lauiloa o ia i lona le talitonu i le Atua, lauiloa i lona faitaaga. E oo lava i isi seila o le vaa sa masiasi i latou i le amio a lenei tagata. A o le amataga o le masina o Mati 1748, na agi ai se matagi matua malosi. Na oo ina lofia le potu o le vaa sa iai Niutone, ma ia faalogoina le alaga a se tasi, "Ua amata goto le vaa!" Na faavave atu Niutone i le pito i luga o le vaa, ma na iloa ai ua masaesae uma la o le vaa, ua gau'i foi ma malepe laupapa o fau ai le vaa. A ua felafoa'iina le vaa e le matagi ma galu mauaululuga. E tele itula o taumafai o ia e tau uliulito le vaa ma faasaga tonu ina ia le fuli ai e galu malolosi, ma le matagi. Ua tete lona 'auvae i le malulu, ua faalogo atu foi ua fai atu lona malosi.

I lea tulaga pagatia, na mana'o ai o ia e tatalo, ae na ia manatu, afai e moni e iai se Atua, e le fia faalogo mai ia te ia. Ua faasolo ane nei i

lona mafaufau nisi o fuaiupu o le Tusi Paia sa ia taulotoina a o tamaitiiti, a o ia fuaiupu e tautala uma mai e uiga i le faamasinoina o se tagata e pei o ia. Ina ua te'a le afa ma to'a foi le sousou o le vasa, ona amata ai lea ona faitauina e Niutone le Feagaiga Fou, i se Tusi

Paia na ia maua i luga o le vaa. O le tala na ia faitauina na ia talitonu, o ia lava lea e faamatalaina mai e le Tusi Paia - "O le Atalii Faamaumaumea," - The Prodigal Son. Ona ia valaau ai lea i le Atua, ma oo ina liuliu mai fofoga alofa o le Atua ia te ia.

I se tausaga mulimuli ane, ona tusia ai lea e Niutone se pese na faaigoa, "The Prodigal Son!" O lea matagi malosi na afatia ai le vaa sa iai Niutone, na ave'a ma mea e pe ai ma malu le matagi sa agi i le olaga o Niutone. Ae ave'a ai o ia ma se tasi o tagata iloga o le Ekalesia Kerisiano i le lalolagi.

E iai taimi e galo ai ia i tatou o loo naunau mai le Atua e faaali mai lona alofa anoanoa'i mo tatou, ma faaali mai lona mana e mafai ai ona ia faafilemuina matagi o agi i o tatou olaga. O a ni matagi o agi i lou olaga i lenei taimi? Valaau i le Atua e fesoasoani mai, ona malu ai lea ma te'a le sou o le vasa.

## E le Tauaso Seisi i le Lagi

E iai se tama talavou e taalo, pe faapea foi, e koloni lava ma faaa'oa'o lana taalo lakapi i le 'au a le iunivesite. E le lelei tele "Tierii" i le taaloga o le mea lea e sea sea ona faataalo ai e le faia'oga o le 'au. Peita'i i le fa tausaga sa tele ina faaleoleo ai i le 'au, e le misia lava ia ia se koleniga a le 'au.

Na matauina lava e le faia'oga le faamaoni o Tieri i le 'au a le a'oga, ma, na ofo fo'i le faia'oga ona na ia matauina fo'i, le pipii o Tieri i lona tama, ma mafana le la mafutaga. E tele lava taimi e vaaia ai e le faia'oga Tieri o talie ma lona tama pe a asiasi atu i le a'oga ma la savalivali i malae o le a'oga, ma 'u'ulima. Ae le'i feiloa'i lava le faia'oga i le tama o Tieri, pe talanoa foi iai, pe ta'ua foi e Tieri lona tama pe a talanoa i le faia'oga.

I le tausaga faai'u o Tieri i le a'oga, i le taimi ua toe o ni nai po oo i le taaloga aupito faitaulia o le vaituuaga, o se taaloga ma se a'oga e fai le la soo ma le a'oga a Tieri, pei o se taaloga i le va o le ami ma le neivi, ae faalogo atu le faia'oga ua tu'itu'i atu se isi i le faitoto'a. E tatala atu le faitoto'a, o tu mai fafo ia Tieri, ma ona foliga matua faanoanoa lava.

Fai mai Tieri, "Lau Susuga, ua oti lo'u tama. E mafai ona ou alu i lo matou aiga mo ni nai aso a o feagai ai lo matou aiga ma le oti o lo'u tama?"

Na faamafanafana atu le faia'oga ia Tieri, ma fai iai e alu i lona aiga se'i mae'a sauniga o le maliu o lona tama toe sau ai. Na faafetai Tieri i le faiaoga ma liliu ma savali ese, ae o le taimi lea na fai atu ai le faia'oga, "Aua e te popole e te vave mai i le tatou taaloga i le Aso Toona'i. Lea ua faataga atu oe e te alu." Ona alu ai lea o Tieri.

*faaauau itulau e 15*

---

# O E UA MALILIU

**Vaaleama Uili Legaoi**  
**Elika Tuiafelolo**  
**20 Iulai 1964-5 Novema 2015**

Na soifua mai i ona matua o Legaoi Elika Tuiafelolo o Fatausi, Safotulafai lona tama, a o si ona tina o Faagi Legaoi o Pu'apu'a,

Faasaleleaga, i le aso 20 Iulai 1964; ae ua faamanavaina ana feau e lona Matai Sili i le lagi i le aso 5 Novema 2015.

Sa malaga ane i Niu Sila (faaili pu a Fatausi) i le 1984, faaipoipo ai ia Alofa Maeataanoa Saipele o Faleapuna, Anoamaa i le aso 24 Novema 1991. E toatasi si a la tama, ma le atalii fai (adopted)

foi e toatasi. Na siitia mai i Ausetalia ma alala i Newcastle i le 1996.

O Fepuari 2012, na ulufale mai ai i le aulotu, ma amata galulue ai loa faa-tagata lotu. O Iulai 2012 na avea ai ma tiakono, a o Ianuari 2013, na faauuina ai e fai ma taitaipese, o nei tofiga uma, ua maliu nei le uso, a o galue punoua'i ma faamaoni pea i ai. Amuia lea auauna, e maua mai e lona Matai

*faaaauau itulau e 16*

---

## E le Tauaso Seisi i le Lagi

*mai le itulau e 14*

Peita'i, i le po o le Aso Faraile, a o taeaoa'ena fai le taaloga faitaulia ma le latou soo, ae toe tu atu Tieri i le faitoto'a o le faia'oga ma fai atu, "O lea ua ou toe sau, ma e iai sa'u talosaga. E mafai ona ou taalo i le fetauiga a le tatou 'au ma le a'oga le la taeao?"

Na taumafai le faia'oga e talanoa ia Tieri e sili ona malolo pea leaga o le la e mamafa ia ia le maliu o lona tama, peitai na i'u lava ina 'ioe le faia'oga i le talosaga a Tieri.

I le po lea o le Aso Faraile, na o le fefulia'i o le faia'oga i lona moega ua le mafai ona moe. O le a le mea na ia 'ioe ai ia Tieri? O le 'au lea o le a latou fetau, o loo manatu uma tagata e matua malo lava i le 'au a le a'oga a Tieri. E mana'omia ai le faataalo o ana tama ta'a'alo e sili ona lelei. A taalo nei Tieri, ae faia'ina leaga le 'au, o le a le mea o le a oo iai pe afai o Tieri e mafua ai? E le tatau lava ona ia faataaloina Tieri. Peitai ua uma ona ia 'ioe ia Tieri.

Oo loa ina amata le taaloga. Ua tata faaili, ua alalaga tagata matamata e aofia ai ma tama ma teine a'oga. Ua tu nei Tieri i le laina e tini iai le isi 'au ma

faatalitali le kikiina mai o le polo e le 'au. Ae ua mafaufau ifo faapea le faia'oga o Tieri, "Talosia e le lelelele le polo i o ia Tieri ae alu aga'i i se isi, ma faata'alo e latou le polo ae le oo ia Tieri. Peitai, na kiki atu lava le polo ma sopo lelei mai e Tieri. Ma tamo'e, sitepu ese ma tama e toatolu na tamomoe atu e pu'e ia. Na pa'u i lalo, toe tu a'e i luga ma toe tamo'e i le isi 20 iata se'ia oo ina taunuu i le laina siko ma faapa'u iai.

Na tuufesili le isi 'au, "O ai le la tama? Tatou te le'i faalogo lava iai." Ma e mo'i lava latou, aua na o le tolu lava minute ua taalo ai Tieri i le latou 'au lea e faaleoleo ai.

Na uma lelei le 'afa muamua o taalo Tieri - tamo'e, tetee, pu'e. Pei lava o le mea fua ia Tieri le pu'eina o tama taaalo o le isi 'au ma lafo i lalo. Na faaaau le taalo lea a Tieri se'ia oo ina mae'a le 'afa lona lua o le taaloga, ma malo ai le latou 'au i le iunivesite le la na fai mai uma tagata e malo mamao i le 'au a Tieri.

Na mae'a le taaloga ona savali atu lea o le faia'oga i le potu e malolo iai lana 'au, ma sa'ili Tieri. Na maua atu o nofonofo mai i se tulimanu, ma ona lima o pupuni ai ona mata. Na fesili atu le faia'oga iai, "Tieri, o le a le mea na tupu?" o le fesili lea a le faia'oga ma tuu lona lima i

luga o le tau'au o Tieri. "E le faapea ona lelei sau taalo! E le faapea ona lelei ma saosaoa sau tamo'e! E le faapea ona lelei sau fe'alofa'i ma e sola mai pu'e a isi tama. O le a le mea na tupu?"

Na vaai a'e Tieri i lona faia'oga, a ua maligiligi lemu ona loimata, ma tali atu, "E te iloa, o lo'u tama e tauaso. O aso uma ia e sau ai e matamata i a'u taaloga, a o le'i oti, na te le iloa ai lava se mea, aua e tauaso. A o la'u taaloga muamua leni ua matamata lelei ai. Aua, lau susuga, e le tauaso se isi i le mea ua iai nei si o'u tama. Aua e le tauaso se isi i le lagi!

(E le iloa le tagata na ia tusia le tala leni, *author unknown*, faamatalaina e Afemata Apelu Aiavao)

---

## Faaau'upega Oe e Ala i le Faatuatua

*mai le itulau 13*

i se lumana'i manuia ma saogalemu.

Ae mafai ona tatou sao mai i ia tulaga faigata, pe a malosi lo tatou faatuatua ia Keriso. E ui ina tuai mai le lavea'i a le Atua, ae oo mai lava. I Kalevario, e foliga mai o se toilalo popo, ae mulimuli ane o le manumalo a'ia'i, ma toe tu mai nai le oti ma le tuugamau. Le masiasi nai le satauro i Kolokota, na liua i le tuugamau tuufua na te le mafai ona taofia le Alii. Ma o lona manumalo, ua fai lea mo tatou i lona alofa tunoa.

---

# O E UA MALILIU



## Lio Eteuati Lio

21 Oketopa 1934-26 Tesema 2015

O le Afioga ia Lioolevave Eteuati Lio ma lona faletua o Soamauli Limasene Lio, sa galulue i lo la tofi tiakono i le Ekalesia EFKS i Fasitootai. O se tasi o matafale galulue i totonu o lenei Ekalesia. O le Afioga i le alii tiakono ia Lio, o le sui o le Mafutaga a Tama, ae faapea foi i lona faletua ia Limasene, i lona galue ai o se sui o le Mafutaga a

Tina.

Na sii ma'i i laua i Niu Sila ina ua gasegase le Afioga i le alii tiakono, ma valaauina ai Lio e lona Matai, ina ua faamanavaina ana galuega i le ola nei i le aso 26 i le masina o Tesema 2015, i le maota gasegase o Bethshaida Care, Manurewa, Niu Sila, i le itula e 1.30 i le afiafi. Sa molimoli mai lona tino maliu i Samoa, ma falelauasi ai le Afioga i le tiakono i lona maota i Fasitootai.

O le aso 8 o le masina o Ianuari 2016, sa faataunuuna ai ona toe sauniga i le malumalu o lana Ekalesia e pele ia te ia, le Ekalesia Faapotopotoga Kerisiano Samoa i Fasitootai. Sa ta'ita'ia lava ona toe sauniga e le Susuga i le Faafeagaiga, Rev. Eric Mulitalo i le itula e sefulu i lea lava taeao, ma faaiu atu ai i lona oliolisaga tumau, i lona maota i Fasitootai lava.

O le Afioga i le alii tiakono o Lio Eteuati ma lona faletua o Soamauli Limasene, o nisi ia o poututoa sa galulue ma lagolago malosi i le galuega i Fasitootai.


O Lio Eteuati na soifua mai i ona matua o Lio Sauluma ma Sialofi Lio Nee Ngshiu. Na faaipoipo atu ia Soamauli Limasene, ma e to'afa nai o la alo, o loo nonofo mau nei ma alaala i Niu Sila ma Ausetalia. Ua toe taliu atu le tina ia Soamauli Limasene i Niu Sila, e toe mafuta ma nonofo faatasi ai ma nai o la alo.

*"Aue ua maliliu toa, ua maumau ai auupega o le taua. Amuia foi lea auaua, auu e maua mai e lona Matai., a o loo faapea ona fai.*

Ia tafi mala le malaga, lau Afioga i le alii tiakono, ma ia maua sou nofoaga tumau i le lagi. Faamaiseina foi le tina loto mafatia ia Soamauli Limasene Lio ma le fanau. *"Na foaiina mai e le Alii, ua aveeseina foi e le Alii, ia faamanuina le suafa o le Alii."*

Faafetai tele.

Rev. Eric Mulitalo FS,  
EFKS Fasitootai.



## Vaaleama Uili Legaoi Elika Tuiafelolo

mai le itulau e 15

a o loo faapea ona fai.

O Vaaleama Uili, o se tiakono tausaaafia ona uiga, e aga malie ma faafiafia loto i soo se tagata, aemaise tina ma fanau iti a le aulotu. O se tama galue lelei, loto foa'i, alofa i le galuega a le Alii. E auai i taumafaiga uma a le nofo-alala o le Ekalesia, le Mafutaga a

Tina, le Au Talavou, Aufaipese male A'oga Aso Sa. Ua misia lava lenei tiakono i le mafutaga.

O lona sauniga faale-aiga, sa faia i le Aso Sa, 15 Novema 2015, sa ou ta'ita'i ma faia le tatalo, o le faifeau faiaoga sikolasipi, Rev. Malutafa Faalili FFA, sa lauga ma faia le Upu faamafanafana. E 22 molimau felanulanua'i o lea afiafi, amata le lotu i le 5.00 ae tuua i le 9.00pm.

O lona toe sauniga, sa feagai ma le Pulega a Sini i Matu, Aso Gafua 16 Novema 2015. Na ta'ita'i le Toeaina, Rev. Elder Siaki Pale Brown FT (Granville); o Rev Gafualeata R. Faitua FS (Penrith) sa faaulufale maia le sa o le uso, ma faitauina le Tusi Paia; o Rev. Iosefa I'uvale FS (Dooside) sa molia talosaga; a o Rev. Tanielu Tuai FS (Cross Roads) sa laugaina le Upu.

Na molimau le tina ia Alofa Elika i le latou mafutaga (24 tausaga) ma le tama ua malaga ese atu. Sa ou tapena foi sina ootoga ole soifua galue o le tiakono i le aulotu i Newcastle, tainane o le Pulega, le Matagaluega i Niu Saelese ma le Ekalesia Aoao. Na faamae'a toe sauniga o le uso i le Sandgate Lawn Cemetry, o iina o loo lagomau ai. Na faatofa atu ia te ia i le pese masani a le 'Au Kerisiano pe a taumavae - "Talofa Uso e! Tofaina oe! Tofa...Tofa...Tofa."

Faamaise pea le Agaga o le Atua i le tina ia Alofa Elika, le fanau ia Jnr Uili ma Vaalele, aiga, uo ma e masani, faapea lenei aulotu ma le nuu o Niukaso, Ausetalia. Ia manuia tele lau malaga Vaa. Alolofa atu i e na muamua....Tofa.

Rev. Elama Fulutusi Alao FS,  
EFKS Newcastle